

章氏遺書

第三四册

章氏遺書外編卷第十三

永清文徵一

永清文徵敘例

永清縣志告成區分紀表圖書政略列傳六體定著二十五篇篇各有例又取一時徵集故事文章擇其有關永清而不能併收入本志者又自以類相從別爲奏議徵實論說詩賦金石各爲一卷總五卷卷爲敘錄如左而總敘大指以冠其編

敘曰古人有專守之官卽有專掌之故有專門之學卽有專家之言未有博采諸家彙輯眾體如後世文選之所爲也官失學廢文采愈繁以意所尙採掇名雋若蕭氏文選姚氏文粹是也循流溯源推而達於治道宋文

之鑑是也相質披文進而欲爲史翼元文之類是也是
數子之用心可謂至矣然而古者十五國風八國國語
以及晉乘楚檮杌與夫各國春秋之旨繹之則列國史
書與其文誥聲詩相輔而行在昔非無其例也唐劉知
幾嘗患史體載言繁瑣欲取詔誥章疏之屬以類相從
別爲一體入於紀傳之史是未察古人各有成書相輔
益章之義矣第窺古人之書國語載言必敘事之終始
春秋義授左氏詩有國史之敘故事去千載讀者洞然
無疑後代選文諸家掇取文詞不復具其始末如奏議
可觀而不載報可寄言有托而不述時世詩歌寓意而
不綴事由則讀者無從委決於史事復奚裨乎文選文

粹固無足責文鑑文類見不及斯豈非尺有所短者哉
近人修志藝文不載書目濫入詩文雜體其失固不待
言亦緣撰志之時先已不辨爲一國史裁其猥陋雜書
無所不有亦何足怪今茲稍爲釐正別具文徵仍於詩
文篇後略具始末便人觀覽疑者闕之聊於敘例申明
其旨云爾

奏議敘錄

奏議之文所以經事綜物敷陳治道文章之用莫重於
斯而蕭統選文用賦冠首後代撰輯諸家奉爲一定科
律亦云所以重輕之義矣如謂彼固詞章家言本無當
於史例則賦乃六義附庸而列於詩前騷爲賦之鼻祖

而別居詩後其任情顛倒亦復難以自解而文苑文鑑從而宗之又何說也今以奏議冠首以爲輯文通例竊比列史之首冠本紀云爾

史家之取奏議如尙書之載訓誥其有關一時之制度者裁入書志之篇其關於一人之樹立者編諸列傳之內然而紀傳篇幅各有限斷一代奏牘文字繁多廣收則史體不類割愛則文有闕遺按班氏漢書備詳書奏然覆檢藝文志內石渠奏議之屬高祖孝文論述冊詔之傳未嘗不於正史之外別有專書然則奏議之編固與實錄起居注相爲表裏者也前人編漢魏尙書近代編名臣章奏皆體嚴用鉅不若文士選文之例而不知

者往往忽而不察良可惜也

杜佑撰通典於累朝制度之外別爲禮議二十餘卷不必其言之見用與否而談言有中存其名理此則著書之獨斷編次之通裁其旨可以意會而其說不可得而迹泥者也然而專門之書自爲裁制或刪或節固無不可史志之體各有識職徵文以補書志之闕則錄而不敘自由舊章今採得奏議四篇咨詳稟帖三篇亦附錄之爲其官府文書近於奏議故類入焉其先後一以年月爲次所以備事之本末云爾

敬陳民困疏

竊惟國家創制立法取其便民也尤期不病於國

未有上下交受其弊而狃於成法相沿而莫思變計者
如今日近畿州縣之運漕剝船誠有可議焉查近畿通
州武清寶坻香河東安永清計一州五縣額設剝船六
百餘隻悉隸總督倉場衙門每船一隻給地十頃免納
正項錢糧以應船差名曰按船給地實則照地僉船立
法未嘗不善但奉行既久種種未便以致民累滋深臣
請爲我 皇上悉陳之念小民應船旣給以地則凡造
船有費駕撐有費水手工食有費篷桅蓆片有費凡一
船日用之需皆取給於地畝之中則三時力作勢不能
分身河干以應公家之務卽欲一意亟公又不能竭力
田間以辦終歲之需此其不便於民者一也至各州縣

距河甚遠勢不得不於河干僱覓民船代爲應役計一
船之費一年約用價銀五六十兩揆之原地納糧遂增
一倍而河下游閒之徒嘗藉之以邀利及至接運漕糧
往往有盜賣攬和之弊甚有盜賣將盡故爲傾覆其船
者迨經運官查明而領船人役逃散一空仍坐地戶賠
償以致傾家蕩產賣男鬻女苦無可控此其不便於民
者二也且南漕告剝雖在倉場衙門而領船船戶實則
天津鈔關部差統轄之每歲河冰未泮之日部差催提
如雨以致船戶往返千里匍匐赴津彙齊過堂查點因
而差提有費過堂有費守候有費種種苦累難以罄舉
此其不便於民者三也尤可憫者連年水旱災荒凡納

種之地例得邀恩照被災分數蠲免獨至一應差船卽
被災甚重顆粒無存不敢不竭蹶以供一年之役同屬
朝廷赤子同一被災地畝而應船者遂不得與納糧
者一例沾 恩此其不便於民者四也更有小民之本
業已圈撥補於他州縣遠者千餘里近亦七八百里往
來征取地租行旅已自告艱乃尙有征租不起逐歲淹
留異鄉流離不可勝計而州縣按名解船訪無正戶以
致株累親族破產賠墊代爲應役此其不便於民者五
也况剝船之設原以備河道淺阻之用時而河道順利
則船雖設而不用而領船人役猶全勒地戶一年之僱
價是以 朝廷正項之賦稅小民終歲之勤劬徒供河

下游閑者之坐食此其不便於民而兼病於國者六
也查見在照地應船有數家共應一隻者有十數家共
應一隻者以地多者爲應船正頭而地少者朋當之往
往窮民不能應役棄地而逃一戶逃亡眾戶爲之賠累
數戶逃亡則賠累更自無窮竊恐窮民賠累愈深相率
而逃則田地多致拋荒而船差亦無着落是欲以速漕
而反誤漕此其不便於民而兼病於國者七也且每
船一隻蒙我皇上軫念苦役每歲仍給水腳銀十餘
兩計船六百餘隻約費庫銀六七千金查每船剝運僅
可容載百石卽遇河道淺阻之日以河下僱見船剝運
計時價沽之遠者運價不過五六兩而止況遇河道順

利之日又不煩剝運乎何竟以國家正項之額賦又重費帑銀之頒給而留此或用或不用之剝船以重爲民累也此其不便於民而兼病於國者八也種種滋累上下交弊不圖變計害將安底以臣愚計之各州縣剝船六百餘隻計地不下六千餘頃按畝定賦照原額每畝二分五釐起科均可征銀一萬五六千金較之河下見僱民船運價抵支有餘伏請勅下該部行查各州縣應船地畝若干合無令各州縣悉照額糧催征彙解倉場衙門貯以備用如遇河道淺阻南漕告剝之日卽動此項銀兩按河下催船時價給發領運各官接濟剝運無煩重支庫銀仍給水腳等項至於河道順利不

煩剝運應以此項銀兩歲終解部庶於窮民不致重累
漕務得以速竣而國賦亦免虛耗之虞矣

右疏載通志藝文署趙之符不知時爲何官
意必巡漕御史也其陳船糧利弊頗爲明晰不知上
於何年而部議如何覆核不可考矣

福建司井田科奏案

呈爲敬陳井田末議仰請睿鑒訓示事乾隆元年四
月十一日內閣抄出總理事務和碩莊親王等議奏甘
國璧等敬陳井田末議請將嗣後井田各戶內有緣事
咨解回旗並情愿回旗當差者咨回本旗所出之缺概
停撥補原頂田戶報部撥各州縣賃種等因一摺查設

立井田一案於雍正三年戶部議准將固安等縣入官地畝設立井田蓋造房屋撥給無業旗人并給與工本銀兩令其耕種原俟行之有效再行擴充地畝以惠養八旗之人乃試行十年以來所設承種之一百八十戶緣事咨回更換者已有九十餘戶循環頂補而八旗咨准井田種地者大都游手無藝不能當差之人到井田後仍不能服勤力穡且多干法紀則行之未見成效乃係實在情形甘國璧等摺內所未聲明者此時若將咨戶盡行撤回則現在盡力農務已經安插得所之人又轉致失業若將不肖之戶咨回之後復行更換頂補勢必增添工本銀兩寬其納糧年限經營錢糧仍屬無益

臣等酌議應令甘國璧等將現在各部詳確查明其中之實力耕種安插得所者改爲屯戶按照地畝完納屯糧原設之領催改爲屯長約束屯戶將現食錢糧照田給與每年交納糧石於附近州縣倉收貯備用改設之屯長聽該處防尉管轄其原設之驍騎校回交該旗補用其中有不肖之戶卽令甘國璧等咨回本旗停其撥補原領田房交該州縣貢種原取租解部再臣等查雍正五年王大臣議准將旗人因犯罪革退無業之發往井田於固安新城二縣入官地內每戶給地三十畝併給與牛具籽種銀兩蓋造土堡房屋令其居住耕種當經各旗查出曾因犯罪革退之人發過六十二名現今

除病故逃亡并調取回旗外實止存二十七戶此二十七戶之人名應令甘國璧等查明將實力耕種者亦照例改爲屯戶安插輪糧併令屯長等管束若其中有不肖之戶亦令咨回該旗等因乾隆元年四月初九日奉旨依議欽此抄出到部相應知照兵部內務府八旗滿州蒙古漢軍都統并抄錄管理井田事務甘國璧等原奏移咨直督轉行遵照仍劄知井田官可也

敬陳屯莊事宜奏疏

乾隆元年十一月二十六日內閣抄出議覆管理井田事務甘國璧等奏屯莊事宜七條

一稱井田每戶原給田一百二十五畝以十二畝五分

爲公田十二畝五分爲室廬場圃一百畝爲私田公田糧石厯係儘收儘報今旣改屯莊應各照完納屯糧未便仍循公田舊例應與酌定額數令其遵守交納等語查井田旣經改爲屯莊自應按畝完納屯糧應如所奏交與戶部核定科則行令該州縣等遵照征收

一堡戶原止給地三十畝俾其自種自養不交公糧今旣改屯自宜按畝完糧但未免拮据似應仰懇天恩賜增地畝等語查雍正五年王大臣議准將旗下因犯罪革退無業之人發往井田給地三十畝令其耕種在案此等無業之人給地耕種令其自食原出自皇恩若令其納糧則屬無力必爲增地又屬多事且現在此

等戶數亦甚無多應仍聽其暫行照舊耕種
一三堡旗人零星居住旗民襍處難於約束稽查請將
各戶原領三堡房地盡交該州縣卽於現今咨回井戶
取遺房地內照數撥給等語查旗人數戶襍處三堡之
間未免混雜應如所奏將各戶原領房地交還州縣卽
於咨回井戶所遺房地內照數撥給

一八旗改屯人戶嗣後身故有子者自應頂補倘遇無
子寡婦情願守節並無親屬可依者請留地四十畝養
贍卽令本屯之人代種完糧俟伊身後仍將地畝交官
種守等語應照所請行

一井田原撥霸州固安永清新城四州縣之地今議改